



Basler Bebbi Basel Binggis

Neys judihee und Dradizione no gseh

Mir Binggis sinn offe fir neyi Sache.
Drum kenne mir au iber Alti lache.
Alti sinn nit so off fir Neys, laider z weenig.
Drum sinn MIR die glaine PC-Keenig.

Wär dr Harry Potter Film nit kennt,
Dä het d SENSATION verpennt.
Und wenn de nit waisch was Quidditsch isch,
denn bisch by uns laider falsch am Disch.

Als FCB Fään simmer an jedem Matsch derbyy,
es git doch nit scheeners als im neye Joggeli z syy.
Dr Chimenez schießt und scho gits e Gool,
mir fraie uns riisig, erscht jetzt isch is wool.

Uff em Haimwäg warte mir uff e ney Drämli.
doch warte kasch glyych lang wie friener, nämli!
die neye Dram, die sinn mega cuul,
nur isch no ebbis mit de Draminsle fuul.

Piccolo spiile au mir ganz verdrosse,
hänn s alt' Mundstigg zum Fänschter uss gschosse.
S Neye seet scheen uss, brilliant isch s im Doon,
doch voruss kasch nit spiile, dasch halt dr Loon.

Euro hoole isch gar nit so schwäär,
wenn do numme s lang waarte nit wär.
au mir hole d Wäärig leen d Zyt nit verinne,
denn mir wänn immer no bim Monopoly gwinne.

S letscht Joor isch so viil basiert in dr Wält,
s goot immer ums glyych: ums liebi Gäld.
Mir dängge an 11. Septämber zrug,
und fyulen is machtloos und lycht unter Drugg.

Dr Brand im Gotthard hätt nit miesse syy,
sone bsoffene Depp schlooft im Dunnel yy.
D Leesig wär aifach, s wär dr Waan,
geend mit de Brummis ab uf d Baan!

Denn kunnt no s Graunding vo dr Swissair Flotte,
s goot zue und här wie bi de Hugenotte.
D'Crossair lauft wyter, bewyyst so iir Kenne,
wär will ene dr Absturz in Ziiri no genne?

Dr Suter, dr Dosé hänn die besser Strategii,
nur seen das die Dumme in Zyri nit yy.
Es weiss es mittlerwyyle die ganzi Wält,
nur Ziiri nit, dert gots nur umms Gäld.

S Fielding-Borers dien bewyysse,
mit Humor kasch d Regierig in d Schrangge wyysse.
Dr Oorde vom dierische Ärscht griegt är verleiit,
wonn em nach Aafroog in Bärn, zum Humor-Maa weiit.

E gueti Figur macht d Frau Fielding scho lang,
drum wirts de Jurassier scho Angscht und Bang.
Si bringe dr Unspunne Stai wieder zrug,
nur het är jetzt Stärnli fir d Europa Brugg.

All die viele Ereignis hänn uns derzue bewooge,
uns schlicht und aifach an Dradizione z wooge.
Drum laufe mir im klassische Charivari verbyy
und luege troztdäm prächtig und farbig dryy.

Und wie isches mit de Dradizione?
Dien sich die hyt nimme loone?
Was wär Basel ooni Voogel Gryff?
emänd de Haafe ooni Schiff?

Was wär wenn d Fasnacht nimmi wär?
Dausigi Häärze wäre läär.
Mir wänn is all das doch erhalte,
drum dien mir Dradizione bhalte.

D Frau Fasnacht isch e Määrligschicht,
git Basel drei Tääg e heerlig Gsicht.
Mir wänn das zaige in Grien, Wyss und Rot,
denn d Frau Fasnacht, die bestoot!

Mir wänn das alles jo nur blasdisch see,
Dradizione dien doch gar nit wee.
So vyy! Guets kenne mir druss leere,
wo mer speeter nimm wänn entbeere.

Mir finde Neys dr greeschti Hit,
doch Dradizione sinn kai Schi...
Mir mechte baides kenne haa,
und schaffe drumm scho jetze draa.

So kenne mir Eych nur weermschtens empfääle,
geend an d'Fasnacht, dient nit s TV wääle.
Fir das händd iir denn speeter Zyt,
geend jetzt uff d Gass, geend unter d'Lyt.

Dient eych vo däm verzaubere loo.
Iir mergget glyy, das macht eych froo.
Lueget die vyyle scheene Ladärne aa,
jeedi isch vom ene Kinschtler, eb Frau eb Maa.

Au hinter jedere Larve stegt e Persoon,
villicht isch si rrych, oder het gar kai Loon.
Ains hänn si alli, das merggsch du glyy,
si alli wänn lache und an dr Fasnacht syy.

*D Ladäärneusstellig isch vom Määndig znacht,
em 18. Hornig bis am Mittwoch demorge, em
20. Hornig uff em Minschterblatz.*

*Hesch oder bisch e Bueb, wo ächt guet drummle
oder pfyffe lere und erscht no e Wahnsinns Plausch
ha will, denn lyt im Obmaa vo dr Junge Garde aa!
Renato Bernasconi, Delifon 061 601 21 55*